



საქართველოს ადვოკატთა ასოციაციის ეთიკის კომისიის რეკომენდაციის 007/18¹ მიმოხილვა

1. შეკითხვა

ადვოკატმა მიმართა ეთიკის კომისიას შემდეგი შეკითხვით - რას გულისხმობს ადვოკატის მიერ პროფესიული საიდუმლოების დაცვის ვალდებულება და გამოიწვევს თუ არა ადვოკატის მიერ პერსონალურ მონაცემთა დაცვის ინსპექტორისთვის ინფორმაციის/დოკუმენტაციის მიწოდება ადვოკატთა პროფესიული ეთიკის კოდექსის მოთხოვნების დარღვევას?

2. სამართლებრივი შეფასება

საადვოკატო საქმიანობის ერთი-ერთი პრინციპია ადვოკატის მიერ პროფესიული საიდუმლოების დაცვა (ადვოკატთა შესახებ საქართველოს კანონის მე-3 მუხლის „კ“ ქვეპუნქტი) ადვოკატი ვალდებულია დაიცვას პროფესიული საიდუმლოება გასული დროის მიუხედავად (ადვოკატთა შესახებ საქართველოს კანონის მე-7.1. მუხლის „ა“ ქვეპუნქტი); ადვოკატს შეუძლია გაამჟღავნოს კონფიდენციალური ინფორმაცია მხოლოდ: ა) კლიენტის თანხმობით, ბ) იმ შემთხვევაში, თუ ასეთი ინფორმაციის გამოყენება წარმომადგენლობის ან დაცვის პროცესში აუცილებელია კლიენტის ინტერესებიდან გამომდინარე და თუ მისი გამჟღავნება კლიენტს ადვოკატისთვის წინასწარ არ აუკრძალავს; გ) იმ შემთხვევაში, თუ ეს აუცილებელია ადვოკატის მიერ მისთვის წაყენებული ბრალდებისგან ან მოთხოვნისგან თავის დასაცავად ან მის მიერ მიუღებელი ჰონორარის თაობაზე სასამართლო დავის არსებობისას (ადვოკატთა შესახებ საქართველოს კანონის მე-7 მუხლი მე-3 ქვეპუნქტი).

მიღებულ უნდა იქნას ყველა აუცილებელი ზომა, რათა უზრუნველყოფილი იქნას ადვოკატ-კლიენტის ურთიერთობის კონფიდენციალურობის პატივისცემა. ამ პრინციპის გამონაკლისები შეიძლება დაშვებულ იქნას მხოლოდ იმ შემთხვევაში, თუ ეს კანონის უზენაესობის პრინციპებს შეესაბამება (ევროპის საბჭოს მინისტრთა კომიტეტის რეკომენდაცია Rec(2000)21 – პრინციპი I, მე-6 პუნქტი).

ინფორმაცია, რომელიც ადვოკატისთვის ცნობილი გახდა მისი პროფესიული საქმიანობის განხორციელებისას, კონფიდენციალურია. ადვოკატი ვალდებულია დაიცვას კონფიდენციალური ინფორმაცია იმგვარად, რომ მესამე პირებს მასზე ხელი არ მიუწვდებოდეს. კონფიდენციალობის დაცვის ვალდებულება ვრცელდება ნებისმიერ ინფორმაციაზე, რაც ადვოკატისთვის ცნობილი გახდა კლიენტისაგან ან იურიდიული რჩევის მიღების სხვა მსურველისაგან, რომელიც ადვოკატმა მიაწოდა კლიენტს ან ადვოკატმა სხვა წყაროდან გაიგო კლიენტთან ან მის საქმესთან დაკავშირებით (ადვოკატთა პროფესიული ეთიკის კოდექსის მე-4 მუხლის პირველი ნაწილი).

საზოგადოებრივმა ადვოკატმა უნდა იმოქმედოს კანონისა და პროფესიული ეთიკის კოდექსის ნორმების შესაბამისად. ადვოკატმა არ უნდა გაამჟღავნოს კონფიდენციალური ინფორმაცია. კერძოდ, არ გადასცეს კლიენტის საქმესთან დაკავშირებული საქმის მასალები მონიტორინგის სამმართველოს წარმომადგენელს - შემფასებელს... „იურიდიული დახმარების

¹ <https://gba.ge/pdf/5c138e23bb0ba.pdf/5c138e23bb0ba.pdf>



შესახებ“ საქართველოს კანონის მე-16 მუხლის მე-4 პუნქტში მითითებულია, რომ საზოგადოებრივი ადვოკატის მიერ საადვოკატო საქმიანობა უნდა ხორციელდებოდეს საქართველოს კონსტიტუციით, ამ კანონით, ადვოკატთა შესახებ საქართველოს კანონით, სამსახურის დებულებითა და სხვა ნორმატიული აქტებით. ამავე მუხლის მე-6 ნაწილის მიხედვით, საზოგადოებრივი ადვოკატები ადვოკატთა პროფესიული ეთიკის კოდექსის შესაბამისად მოქმედებენ. სხვა რაიმე დათქმა იურიდიული დახმარების შესახებ საქართველოს კანონში, სადაც მითითებული იქნებოდა, რომ ადვოკატის საქმიანობის დამოუკიდებლობაში ჩარევა ან ადვოკატისა და კლიენტის ურთიერთობის კონფიდენციალურობის გამჟღავნება შესაძლებელი იქნებოდა - არ არსებობს, გარდა ადვოკატთა პროფესიული ეთიკის კოდექსის მე-4 მუხლის მე-4 ნაწილში მითითებული პირდაპირი დათქმებისა (2016 წლის 12 იანვრის №010/15 ეთიკის კომისიის რეკომენდაცია).

აქედან გამომდინარე, კონფიდენციალურია ნებისმიერი სახის ინფორმაცია, რომელიც ადვოკატისათვის ცნობილი გახდა მისი პროფესიული საქმიანობის განხორციელებისას. ადვოკატმა შესაძლოა სხვა წყაროდანაც მიიღოს კლიენტის საქმის თაობაზე ინფორმაცია საადვოკატო საქმიანობისას - ასეთი სახით მიღებული ინფორმაციის დროსაც მან უნდა დაიცვას ეთიკური ვალდებულება.

ადვოკატი არის თავისუფალი პროფესიის პირი და დამოუკიდებელი და ის ემორჩლება კანონსა და ადვოკატთა პროფესიული ეთიკის კოდექსს. ადვოკატს თავისი პროფესიიდან გამომდინარე მოეთხოვება მაღალი ეთიკური სტანდარტის დაცვა. არც ადვოკატის პროფესიის და არც პერსონალურ მონაცემთა დაცვის თაობაზე მარეგულირებელი ნორმების მიხედვით არ არის დათქმა იმის თაობაზე, რომ ადვოკატს პერსონალურ მონაცემთა დაცვის ინსპექტორის მიერ მოთხოვნისთანავე შეუძლია მას გადასცეს ნებისმიერი სახის ინფორმაცია, რაც მან მიიღო პროფესიული საქმიანობის განხორციელებისას და უკავშირდება ამჟამინდელი, ყოფილი თუ პოტენციური კლიენტის შესახებ ინფორმაციის და საქმის მასალის გადაცემას. შესაბამისად, ასეთ შემთხვევაში, ადვოკატი ვალდებულია, იმოქმედოს კანონისა და პროფესიული ეთიკის კოდექსის შესაბამისად და არ გაამჟღავნოს კონფიდენციალური ინფორმაცია

3. დასკვნა

ადვოკატის პროფესიული საიდუმლოება წარმოადგენს საადვოკატო საქმიანობის ერთ-ერთ პრინციპს, რომლის თანახმად, კანონით პირდაპირ დადგენილი გამონაკლისების გარდა, ადვოკატი ვალდებულია არ გახადოს კლიენტისგან მიღებული ინფორმაცია ხელმისაწვდომი მესამე პირებისათვის, რაც არ არის შეზღუდული დროში. ადვოკატმა პროფესიული საქმიანობის განხორციელებისას მიღებული ინფორმაცია არ უნდა გაამჟღავნოს, გარდა იმ გამონაკლისი შემთხვევებისა, რასაც ითვალისწინებს ადვოკატთა შესახებ საქართველოს კანონი და ადვოკატთა პროფესიული ეთიკის კოდექსი.